



O'ZBEKISTON RESPUBLIKASI
OLIY TA'LIM, FAN VA INNOVATSIYALAR VAZIRLIGI
SHAROF RASHIDOV NOMIDAGI SAMARQAND DAVLAT UNIVERSITETINING URGUT FILIALI

BUYRUQ

2023 yil "30" noyabr

№ 64 -ij

Urgut tuman.

O'zbekiston Respublikasi Oliy ta'lim, fan va innovatsiyalar vazirligining 2023-yil 22-noyabrdagi 505-son buyrug'i ijrosini ta'minlash to'g'risida

O'zbekiston Respublikasi Prezidentining "Yangi O'zbekiston ma'muriy islohotlarini amalga oshirish chora-tadbirlari to'g'risida" 2022-yil 24-dekabrda PF-269-son Farmoni hamda Oliy va o'rta maxsus ta'lim vazirligi va Yoshlar ishlari agentligi tomonidan 2022-yil 24-oktyabrda tasdiqlangan Talaba-yoshlarning bo'sh vaqtini mazmunli tashkil etishga qaratilgan Kompleks chora-tadbirlar rejasining 5-bandida belgilangan vazifalar ijrosi hamda O'zbekiston Respublikasi Oliy ta'lim, fan va innovatsiyalar vazirligining 2023-yil 22-noyabrdagi 505-son buyrug'i ijrosini ta'minlash maqsadida

BUYURAMAN:

1. O'zbekiston Respublikasi Oliy ta'lim, fan va innovatsiyalar vazirligining 2023-yil 22-noyabrdagi 505-son buyrug'i rahbarlik va ijro uchun qabul qilinsin.

2. Filialda talaba-yoshlar o'rtasida atoqli adiblar va mutafakkirlarimiz ijodiy merosini keng targ'ib qilish, ularning adabiyotga qiziqishlarini yanada oshirish hamda o'z iqtidorlarini namoyish etish uchun imkoniyat yaratish maqsadida "**Ma'rifat maydoni**" respublika tanlovi (keyingi o'rinlarda-Tanlov) Oliy ta'lim, fan va innovatsiyalar vazirligining 2023-yil 22-noyabrdagi 505-son buyrug'i bilan tasdiqlangan "Oliy ta'lim muassasalari talaba-yoshlari o'rtasida o'tkaziladigan "**Ma'rifat maydoni**" respublika tanlovi nizomi"ga muvofiq o'tkazilsin.

3. Yoshlar masalalari va ma'naviy-ma'rifiy ishlar bo'yicha direktorning birinchi o'rinbosari (Z.Sh.Yazdonov):

tanlov ishtirokchilarini xavfsizligini ta'minlagan holda tanlovning hududiy, mintaqaviy va respublika final bosqichlarida ishtirokini ta'minlash vazifasi yuklatilsin.

4. Reja-moliya bo'limi boshlig'i (Sh.U.Ismatilloev):

tanlov va xizmat safari bilan bog'liq barcha xarajatlarni filialning budjetdan tashqari mablag'lari hisobidan qoplash vazifasi yuklatilsin.

5. Devonxona mudiri **Sh.Hakimovga** mazkur buyruqni tegishli masullarga yetkazish vazifasi yuklatilsin.

6. Mazkur buyruq ijrosining nazorati Yoshlar masalalari va ma'naviy-ma'rifiy ishlar bo'yicha direktorning birinchi o'rinbosari Z.Sh.Yazdonov zimmasiga yuklatilsin.

Asos: O O'zbekiston Respublikasi Oliy ta'lim, fan va innovatsiyalar vazirligining 2023-yil 22-noyabrdagi 505-sonli buyrug'i hamda Yoshlar bilan ishlash, ma'naviyat va ma'rifat

bo'limi boshlig'i v.v.b N.S.Jo'rayevning buyruq loyihasi, Yoshlar masalalari va ma'naviy-
ma'rifiy ishlar bo'yicha direktorning birinchi o'rinbosari Z.Sh.Yazdonov, reja moliya bo'limi
boshlig'i Sh.U.Ismatilloev, katta yuriskonsult M.T.Mingboyevning roziligi, direktor
Q.S.Yarashevning munosabat belgisi.

Direktor:



Q.Yarashev

Oliy ta'lim muassasalari talaba-yoshlari o'rtasida o'tkaziladigan
"Ma'rifat maydoni" respublika tanlovi
NIZOMI

I. Umumiy qoidalar

1. Mazkur Nizom oliy ta'lim muassasalarida tahsil oluvchi talaba-yoshlar o'rtasida "Ma'rifat maydoni" respublika tanlovini (*keyingi o'rinlarda Tanlov deb yuritiladi*) o'tkazish tartibini belgilaydi.

II. Tanlovning maqsad va vazifalari

2. Tanlov mamlakatimizda amalga oshiralayotgan keng ko'lamli islohotlarda yoshlarning faol ishtirokini ta'minlash, talaba-yoshlarni ezgu maqsadlarga ilhomlantirish, adabiyotning ta'sirchan kuchidan foydalanish, ajdodlar merosini o'rganish, buyuk madaniyatimizga munosib buyuk adabiyot yaratish maqsadini ko'zlaydi.

Shu jumladan, talabalar-yoshlar o'rtasida atoqli adiblar va mutafakkirlarimiz ijodiy merosini keng targ'ib qilish, ularning adabiyotga qiziqishlarini yanada oshirish, ularga o'z iqtidorlarini namoyish etish uchun imkoniyat yaratish hamda ularni rag'batlantirish maqsadida tashkil etiladi.

III. Tanlovni tashkil etish

3. Tanlov (*tashkilotchi*) Oliy ta'lim, fan va innovatsiyalar vazirligi huzuridagi Talaba va o'quvchilarning ijtimoiy faolligini oshirish markazi tomonidan tashkil etiladi. Tanlovda san'at oliygohlaridan tashqari respublikadagi barcha oliy ta'lim muassasalarining talabalaridan tashkil topgan jamoalar ishtirok etishlari mumkin.

4. Tanlovni tashkil etish va uni o'tkazish mas'ul tashkilotlarning vakillaridan shakllantirilgan Respublika tashkiliy ishchi guruh zimmasiga yuklatiladi.

5. Tanlovda ishtirok etuvchi jamoa a'zolari 12 nafargacha tarkibda shakllantiriladi.

IV. Tanlovni o'tkazish tartibi

6. Tanlov to'rt bosqichda o'tkaziladi.

7. Tanlovning **1-bosqichi** oliy ta'lim muassasasidagi fakultetlar jamoalari o'rtasida, **2-bosqichi** Qoraqalpog'iston Respublikasi, viloyatlar va Toshkent shahrida joylashgan oliy ta'lim muassasalari o'rtasida, **3-mintaqaviy va 4-respublika bosqichlarini** o'tkazish muddatlari Respublika tashkiliy ishchi guruhi tomonidan belgilanadi va 10 kun oldin oliy ta'lim muassasalariga vazirlikning xati orqali ma'lum qilinadi.

8. Tanlovning 1, 2, 3-bosqichlarida Hakamlar hay'ati xulosasiga ko'ra faqat 1 ta jamoaga keyingi bosqichda ishtirok etish uchun yo'llanma beriladi.

9. Mintaqaviy saralash bosqichida respublika bo'ylab 5 ta mintaqada doirasida jamoalar o'zaro kuch sinashadi.

10. Hududlarda tanlovni tashkil etish va o'tkazish bo'yicha hududiy tashkiliy ishchi guruh tarkibiga hududdagi oliy ta'lim muassasalari, O'zbekiston Yozuvchilar uyushmasi hududiy bo'limlari, madaniyat va san'at sohasi vakillaridan iborat mas'ul xodimlar (*kelishuv asosida*) kiritiladi.

V. Tanlov shartlari va baholash mezonlari

11. Tanlov quyidagi 3 ta shart asosida o'tkaziladi:

1-shart. "Adib hayoti" Adiblar xiyobonida o'rnatilgan atoqli shoir va adiblarning haykallari siymolari tasvirlangan, ushbu adiblardan 1 nafarini jamoalar o'zi tanlagan holda hayoti va ijodini chuqur o'rganish, ularning ibratli umr yo'llarini mukammal ko'rsata olish ko'rgazmali taqdimot shaklida namoyish etishlari shart.

Ushbu shartga 10 daqiqa vaqt beriladi va 10 ballik tizimda baholanadi.

2-shart. "Tezkor savol-javob"

Jamoalarga Hakamlar hay'ati tomonidan Adiblar xiyobonida haykallari o'rnatilgan atoqli shoir va adiblarning hayoti va ijodidan 10 ta savol, o'ylash va javob berish uchun jamoaga har bir savol uchun 30 soniyadan vaqt ajratiladi. Respublika ishchi guruh tomonidan savollar tuziladi va joylarga yetkaziladi.

Savollarga to'g'ri, aniq va qisqa, ravon nutqda jamoaviy javob beriladi.

Ushbu shart 10 ballik tizimda baholanadi.

3-shart. "Adiblar hayoti va ijodidan teatrlashtirilgan kompozitsiya"

"Adabiyot xalqning yuragi, elning ma'naviyatini ko'rsatadi. Bugungi murakkab zamonda odamlar qalbiga yo'l topish, ularni ezgu maqsadlarga ilhomlantirishda adabiyotning ta'sirchan kuchidan foydalanish kerak. Ajdodlar merosini o'rganish, buyuk madaniyatimizga munosib buyuk adabiyot yaratish uchun hamma sharoitlarni yaratamiz" Yurtboshimizning shu so'zlaridan kelib chiqib, qatag'on qurbonlari bo'lgan shahidlar, adiblar, shoirlar hayotining real voqeliklarini xalqimizga yetkazib berishimiz kerak, shoirlar, adiblar hayotidan bir kun, yoki ularning hayotidan ibrat bo'ladigan voqeliklarni teatrlashtirilgan sahna orqali yoshlarimizga yetkazib berish, ularda vatanparvarlik tuyg'ularini shu orqali yanada shakllantirish, kiyim, rekvizit, dekoratsiya va boshqa vositalardan foydalanish imkoniyati hisobga olinadi. (*Ushbu shartda adiblar xiyobonida haykallari o'rnatilgan atoqli shoir va adiblarning hayoti va ijodi hamda haykallari o'rnatilmagan barcha atoqli shoir va adiblarning ijodidan ham teatrlashtirilgan kompozitsiya ijro etish mumkin*).

Ushbu shartga 30 daqiqagacha vaqt beriladi.

Quyida keltirib o'tilgan shart sahnada ijro etilgan tanlangan asarning badiiy-
g'oyaviy talqini va yechimi, sahna bezagi, musiqiy ifodasi va ijrochilarning mahorat darajasini etiborga olib 10 ballik tizimda baholanadi.

VI. Baholash komissiyasi

12. Tanlovni yuqori saviyada o'tkazish maqsadida Tashkiliy ishchi guruh shakllantiriladi.

13. Tashkiliy ishchi guruhga quyidagi vazifalar yuklatiladi:
tanlovni sifatli savollar bilan ta'minlash;

savollarning maxfiylikni kafolatlash;
tanlovni Nizom talablariga asosan odilona baholash;

14. Tanlovda jamoalarning ballari teng kelib qolgan taqdirda Hakamlar hay'ati tomonidan qo'shimcha shart yoki savol beriladi va g'olib jamoa aniqlanadi.

VII. G'oliblarni taqdirlash

15. Tanlovning 1-bosqichida ishtirok etgan barcha jamoalarga oliy ta'lim muassasasining sertifikatlari topshiriladi.

16. Tanlovning 2-bosqichida 1, 2, 3-o'rinni qolgan kiritgan jamoalarga oliy ta'lim muassasasining diplomi va faol ishtirok etgan jamoalarga faxriy yorliqlari topshiriladi.

17. Tanlovning 3-mintaqaviy bosqichida g'oliblikni qo'lga kiritgan jamoa a'zolari ishtirok etayotgan ta'lim muassasasi tomonidan, ta'lim muassasasining byujetdan tashqari mablag'lari hisobidan 1 donadan planshet hamda diplom, faxriy yorliqlar bilan taqdirlanadi.

18. Respublika yakuniy final bosqichida Hakamlar hay'ati xulosasi hamda Respublika tashkiliy ishchi guruh raisi bayonnomasiga asosan 1, 2, 3, 4, 5-o'rinni qo'lga kiritgan g'olib bo'lgan jamoalar hamda tashkilotchilar Oliy ta'lim, fan va innovatsiyalar vazirligi tomonidan vazirlikning oliy ta'lim muassasalarini rivojlantirish jamg'armasi mablag'lari hisobidan quyidagi tartibda:

1 - o'rin – 40 million so'm,

2 - o'rin – 25 million so'm,

3 - o'rin – 20 million so'm,

4 - o'rin – 10 million so'm,

5 - o'rin – 5 million so'm pul mukofotlari bilan taqdirlanadi hamda tanlovni tashkil etgan tashkilotchi (4 nafargacha) mas'ul xodimlari mehnatga haq to'lashning eng kam miqdorini 10 barobari hisobida bir martalik pul mukofoti bilan rag'batlantiriladi.

VIII. Yakuniy qoidalar

19. Davlat va nodavlat tashkilotlari tanlovda homiylik qilishlari mumkin.

20. Tanlovning Nizom talablari asosida ijrosini nazorat qilish Respublika tashkiliy ishchi guruh zimmasiga yuklatiladi.

21. Mintaqaviy va yakuniy bosqichda Hakamlar hay'ati azolari Respublika tashkiliy ishchi guruhi tomonidan belgilanadi hamda xizmat safari bilan bog'liq sarf-xarajatlar xodimning asosiy ish joyidan qoplanadi.